



Sud Bosne i Hercegovine
Суд Босне и Херцеговине

Broj: S1 3 Iž 042031 21 Iž
Sarajevo, 13.01.2022.godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka, kao predsjednika vijeća, Dinke Beslagić-Čovrk i Vesne Trifunović, kao članova vijeća, odlučujući o žalbi Slađane Pejaković iz L., ..., izjavljenoj protiv rješenja Centralne izborne komisije Bosne i Hercegovine, broj: 06-1-07-1-502/21 od 23.12.2021.godine, kojom se ne daje saglasnost na Odluku o imenovanju u članstvo Gradske izborne komisije Livno, u nejavnoj sjednici, održanoj dana 13.01.2022. godine, donio je

R J E Š E N J E

Žalba se odbija kao neosnovana.

O b r a z l o ž e n j e

Rješenjem Centralne izborne komisije Bosne i Hercegovine, broj i datum navedeni u uvodu, nije data saglasnost na Odluku Gradskog vijeća Livno broj: 01-02-2762/21-1 od 24.09.2021.godine, kojim se na dužnost u članstvu Gradske izborne komisije Livno imenuje: 1. Slađana Pejaković, članica.

Žaliteljica je blagovremeno uložila žalbu na navedeno rješenje zbog nepotpuno i nepravilno utvrđenog činjeničnog stanja i pogrešne primjene materijalnog prava.

U žalbi navodi da nije došlo do povrede postupka izbora članova Gradske izborne komisije Livno, te da Centralna izborna komisija BiH nema razloga uskratiti saglasnost na imenovanje žaliteljice, s obzirom da ona nije član uže porodice. Osim toga i prema Uputstvu o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u BiH nigdje ne ograničava Gradsko vijeće u imenovanju članova komisije za provedbu postupka po javnom oglasu, te ne traži ni u kakvim slučajevima izuzimanje pojedinih članova komisije, pa ni u slučajevima da se na javni oglas prijavi njihova sestra.

Konačno predlaže da apelaciono odjeljenje Suda BiH da pobijano rješenje CIK BiH ukine i vrati ponovo Centralnoj izbornoj komisiji Bosne i Hercegovine na ponovno odlučivanje.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Rješenjem Centralne izborne komisije BiH broj 06-1-07-1-502/21 od 23.12.2021. godine nije data saglasnost na odluku Gradskog vijeća Livno broj: 01-02-2672/21-1 od 24.09.2021. godine, kojom se na dužnost u članstvu Gradske izborne komisije Livno, imenuje Slađana Pejaković, članica.

Iz stanja spisa proizilazi da je u skladu sa članom 7. stav (1) tačka a) Uputstva o utvrđivanju kvalifikacija, broja i imenovanja članova izborne komisije osnovne izborne jedinice u BiH (Službeni lasnik BiH br. 29/18 i 36/19). Gradsko vijeće Livno donijelo Odluku broj:01-02-617/21 od 11.03.2021. godine kojom je utvrdilo da će postupak po Javnom oglasu za imenovanje tri člana Gradske izborne komisije Livno porvesti Komisija za izbor, imenovanje i administrativna pitanja Gradskog vijeća Livno.

Odredbom člana 2.12. stav (5) Izbornog zakona Bosne i Hercegovine („Sl. glasnik BiH“, broj: 23/01,7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da članove općinskih i gradskih izbornih komisije imenuje općinsko vijeće, odnosno skupština općine, uz saglasnost Centralne izborne komisije Bosne i Hercegovine, na osnovu javnog oglasa po proceduri koju utvrđuje Centralna izborna komisija Bosne i Hercegovine. Odredbom člana 10. stav (2) Uputstva je propisano da Centralna izborna komisija Bosne i Hercegovine daje pisanu saglasnost na odluku o imenovanju članova izborne komisije, ukoliko su ispoštovane procedure iz člana 7. ovog uputstva i ukoliko izabrani kandidati ispunjavaju propisane uslove, i tu saglasnost dostavlja nadležnom organu.

U konkretnom slučaju, Centralna izborna komisija Bosne i Hercegovine je, u okviru svojih nadležnosti propisanih Izbornim zakonom Bosne i Hercegovine, ispitala sve okolnosti relevantne za davanje saglasnosti u skladu sa članom 10 stav 2 Uputstva i člana 2.12 stav 5 Izbornog zakona Bosne i Hercegovine.

Međutim, u skladu sa članom 2.9 stav (1) 17 Izbornog zakona BiH, Centralnoj izbornoj komisiji BiH su data sva ovlaštenja za provođenje, nadgledanje i ispitivanje zakonitosti rada svih izbornih komisija. Zato, cijeneći utvrđenu činjenicu da je u radu konkursne komisije, odnosno izboru učestvovala vijećnica Iva Krišto, koja je sestra prvorangirane kandidatakinje Pejaković Slađane, na ovaj način je Centralna izborna komisija ocjenila zakonitost Odluke Gradskog vijeća Livno. Kako je utvrdila da je jedan od kandidata sestra člana Komisije, što dovodi u sumnju objektivnost izbora, a samim tim i zakonitost postupka izbora Gradske izborne komisije Livno,osnovano je Centralna izborna komisija BiH odbila dati saglasnost za imenovanje žaliteljice.

U situaciji kada je ispoštovana procedura propisana Uputstvom o imenovanju članova izborne komisije pobijana odluka nije donijeta ni u skladu sa Poslovníkom o radu Općinskog vijeća Livno (Službeni glasnik Općine Livno, broj 5/12), koji u članu

1. propisuje organizaciju i rad vijeća, u skladu sa zakonom i ustavom, a time i povjerenstava koje je osnovao.

Bez značaja je ukazivanje žalbe da Izborni zakon Bosne i Hercegovine ne zabranjuje sestrama vijećnika članstvo u izbornoj komisiji. U konkretnom slučaju član Povjerenstva za izbor učestvovala je u izboru sestre za člana općinske izborne komisije što ne dovodi u pitanje sukob interesa članova izborne komisije, nego objektivnost tijela tj. organa koje bira članove. Ostale žalbene navode drugostepeno vijeće kao irelevantne nije posebno ni cijenilo.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA

Sudija

Sreto Crnjak